



## LABANK SANTRAL SESEL

Bwat Postal 701, Viktorya, Sesel

Tel: + (248) 4 282 000; Fax: + (248) 4 226 104

Sit web: [www.cbs.sc](http://www.cbs.sc)

---

### KOMINIKE LAPRES

*Viktorya – le 30 Mars 2018*

#### **Labank Santral i annons lamannman dan regilasyon ki govern bann fre e kou pour bann lenstitisyon finansyel**

Labank Santral Sesel in anons bann lamannman ki'n ganny fer dan "Financial Institutions (Bank Charges and Fees) Regulations, 2013", sa i regilasyon ki govern bann fre e kou ki bann labank i sarze lo zot bann prodwi ek servis. Sa bann lamannman in ganny fer avek bi pour ranforsi latransparans e pran an kont devlopman teknolozi dan sistenm banker.

Sa bann lamannman, ki pour pran lefe apatir le 1 Avril 2018, i konm swivan:

**Term "first home buyer" in ganny amande pour vin "first home acquirer"**. Sa sanzman i enkli bann endividi ki'n ganny zot premye lakaz atraver lavant, osi byen ki bann endividi ki'n ganny zot premye lakaz atraver leritaz.

**Pri maksimonm ki en labank pour kapab sarze konman fre lo prosedir laplikasyon lón pour bann endividi ki pe aste zot premye lakaz i aprezan de mil senk san roupi (R2,500) lo en lón lavalen enn pwen senk milyon roupi (R1.5m) ou mwens.** Pour bann lón ki par lao R1.5m, labank pour sarz R2,500 lo sa premye R1.5 milyon e zero pwen senk poursan (0.5%) lo sa morso lón ki par lao R1.5 milyon.

**Piblikasyon e notifikasyon lo bann fre e kou ki labank i sarz piblik pour reste parey pour bann labank ki napa en sit web. Peryod pour bann labank pibliy dan en zournal lokal, zot lalis konplet pour zot bann fre e kou ki aplikab lo zot bann prodwi e servis in sanze, pour donn plis fleksibilite lo dat piblikasyon.** Dan plas en dat fiks, bann labank pour aprezan kapab fer zot piblikasyon okenn dat, avan dernyen zour mwan Mars, Zen, Septanm e Desanm pandan sak lannen. Bann labank ki annan en sit web pour aprezan kapab pibliy zot lalis konplet lo zot sit wèb, omwen de fwa par an, e dan en zournal lokal omwen en fwa par an. Par kont, okenn labank ki fer sanzman dan bann fre e kou zot bann servis ou prodwi, pour bezwen pibliy sa bann sanzman dan en zournal lokal 15 zour avan i pran lefe.

**Bann labank pour aprezan kapab sarz en fre lo bann lón an deviz etranzer, si zot ganny peye avan zot dat matirite.** Sa lamannman i pran an kont risk ek kou eleve ki asosye avek sa bann lón. Par kont, sa sanzman pa afekte peyman lón an rounpi ki ganny fer avan son dat matirite, ki vadir ki okenn kou pa pour ganny sarze si en endividi i deside revey son lón an rounpi an antye, avan sa peryod ki i ti'n agree avek son labank.

**Bann labank i oblize donn kliyan en kopi zot stement lo zot kont sevings ek lón san okenn sarz onmwèn de fwa par an pour kouvert aktivite lo sa de kategori kont pour en peryod omwèn sis mwàn.** Labank i kapab sarz son kliyan pour okenn kopi stement adisyonnèl. Par kont, bann stement elektronik pa pour ganny sarze.

**Fre e kou pour aprezan aplikab letan en endividi i retir larzan lo "ATM" an servan son kart banker ki'n gany founni par en labank aletranze.** Sa i vadir ki bann labank lokal i aprezan kapab sarz konmisyon ki bann labank aletranze i enpoze, ler en endividi i retir larzan lo "ATM" an servan en kart banker, me sa pa pour aplikab pour okenn kart banker ki'n ganny founni par bann labank lokal.

**Lentere ki en labank i kapab sarz en endividi ki an defo avek reveyman son lón pa sipoze plis ki senk pousan (5%) par an.** Sa kou pour kapab ganny aplike lo bann peyman ki'n ganny manke selman, e non pa lo lentere ki aplikab pour sa peyman.

**Pour napa okenn sarz ki pour aplikab pour transfer larzan par en kliyan ant son bann kont banker ki swa lo son non selman, ouswa en kont konzwent, si sa bann kont i dan menm labank.**

Sa bann lamannman ki ganny reflekte dan de nouvo regilasyon, notaman "Financial Institutions (Bank Charges and Fees) (Amendment) Regulations, 2018" e "Financial Institutions (Bank Charges and Fees) (Amendment) (No. 2) Regulations, 2018" ti ganny publiye dan gazet ofisyel le 5 Mars 2018 e le 19 Mars 2018 respektivman. Sa nouvo regilasyon i osi ganny trouve lo sit wèb Labank Santral [www.cbs.sc](http://www.cbs.sc) .